

Adopted by the General Meeting of the "Tbilisi Arbitration Chamber, Ltd." on 7 December, 2000

მუდმივმოქმედი კერძო არბიტრაჟის - შ. პ. ს.

"თბილისის საარბიტრაჟო პალატის"

1.1. თბილისის საარბიტრაჟო პალატა (შემდგომში პალატა) - შ. პ. ს. "თბილისის საარბიტრაჟო პალატა".

1.2. დავა - დავა, რომლის განხილვაც ეთხოვა ან რომელიც დაექვემდებარა პალატას.

1.3. მხარე - მხარე იმ დავისა, რომლის განხილვაც ეთხოვა ან დაექვემდებარა არბიტრაჟს. ამასთან, "როგორც მხარეზე "მოსარჩლეზე" ან "მოპასუხეზე" მითითება პირობითია და აღნიშნავს არბიტრაჟისადმი მიმართვის რიგითობას.

1.4. არბიტრაჟი - მხარეთა ან პალატის მიერ დავის გადასაწყვეტად ამ დებულების მიხედვით არჩეული და დანიშნული არბიტრაჟი (ერთი, სამი ან ხუთი არბიტრი).

1.5. საარბიტრაჟო შეთანხმება - დავამდელი ან დავის შემდგომი (საარბიტრაჟო განხილვის დაწყების თარიღამდე) მხარეთა წერილობითი შეთანხმება, ამა თუ იმ დავის საარბიტრაჟო განხილვის გზით მოწესრიგების შესახებ. ამასთან, თუ მხარეებს შორის არსებობს რამოდენიმე ასეთი შეთანხმება, მაშინ ძალაშია თითოეულის ის ნაწილი, რომელიც არ ეწინააღმდეგება უფრო გვიან მიღწეულ შეთანხმებას და / ან არ გაუქმებულა უფრო გვიან მიღწეული შეთანხმებით.

1.6. პალატის თავმჯდომარე - შ. პ. ს. " თბილისის საარბიტრაჟო პალატის " თავმჯდომარე ან მისი მოვალეობის შემსრულებელი, რომელთაც ნიშნავს პალატის საერთო კრება.

1.7. პალატის გადაწყვეტილება - პალატის თავმჯდომარის, თავმჯდომარის მოვალეობის

შემსრულებლის ან თავმჯდომარის მიერ შექმნილი კოლეგიის გადაწყვეტილება.

1.8. არბიტრაჟის თავმჯდომარე - არბიტრაჟის თავმჯდომარე ან არბიტრაჟის ერთადერთი წევრი.

1.9. საარბიტრაჟო განხილვის თარიღი - პალატის მიერ დავის საარბიტრაჟო განხილვისათვის მიღების გადაწყვეტილებაში მითითებული თარიღი.

1.10 არბიტრაჟის გადაწყვეტილება - საარბიტრაჟო განხილვის პროცესში არბიტრაჟის მიერ მიღებული გადაწყვეტილება და არბიტრაჟის საბოლოო ანუ საარბიტრაჟო გადაწყვეტილება.

რეკომენდებული საარბიტრაჟო დათქმა

თუ ხელშელმკვრელ მხარეებს სურთ, რომ მათ შორის წარმოშობილი დავა განიხილოს თბილისის საარბიტრაჟო პალატამ, სასურველია რომ მხარეებმა დადებულ ხელშეკრულებაში ჩართონ შემდეგი საარბიტრაჟო დათქმა :

" ამ ხელშეკრულებასთან დაკავშირებით წარმოქმნილი ნებისმიერი დავა, მათ შორის თვით ამ ხელშეკრულების არსებობის, ნამდვილობის, შეწყვეტის ან ბათილობის საკითხი განსახილველად და საბოლოო გადაწყვეტილების მისაღებად გადაეცემა თბილისის საარბიტრაჟო პალატას, რომლის დებულებაც (დანართების ჩათვლით) ამ დათქმის განუყოფელ ნაწილად ითვლება. "

შენიშვნა : ხელშეკრულებაში ასეთი დათქმის არარსებობა არ ართმევს მხარეებს უფლებას დავის გადასაწყვეტად მიმართონ თბილისის საარბიტრაჟო პალატას.

II. ზოგადი დებულებები

2.1. პალატა არის დავების კერძო საარბიტრაჟო განხილვის დამოუკიდებელი, მუდმივმოქმედი ინსტიტუტი, რომელიც მოქმედებს კერძო არბიტრაჟის შესახებ საქართველოს კანონმდებლობისა და თავისი დებულების შესაბამისად.

2.2. ამა თუ იმ დავის საარბიტრაჟო განხილვისათვის მიღების საკითხს წყვეტს პალატა საარბიტრაჟო პრეტენზიისა და საარბიტრაჟო პრეტენზიაზე პასუხის საფუძველზე.

2.3. პალატის მიერ საარბიტრაჟო განხილვისათვის მიღებული დავა გადაეცემა ამ დებულების შესაბამისად შექმნილ არბიტრაჟს.

2.4. არბიტრაჟის კომპეტენციის საკითხს კონკრეტულ საქმესთან დაკავშირებით წყვეტს ამ დავის განმხილველი არბიტრაჟი. ამასთან, საარბიტრაჟო შეთანხმება როგორც ხელშეკრულების ნაწილი, განიმარტება როგორც შეთანხმება, რომელიც დამოკიდებული არ არის ხელშეკრულების სხვა პირობებზე ; ხელშეკრულების ბათილად ცნობა თავისთავად არ გამოიწვევს საარბიტრაჟო შეთანხმების ბათილობას. გადაწყვეტილებას თავისი კომპეტენციის და უფლებამოსილების შესახებ არბიტრაჟი იღებს თავისი შეხედულებისამებრ, სპეციალური გადაწყვეტილების სახით ან ეს საკითხი შეიძლება ასახოს საქმის არსებითად განხილვის შემდეგ საბოლოო საარბიტრაჟო გადაწყვეტილებაში.

2.5. პალატის მიერ დავაზე თავისი იურისდიქციის ცნობის შემთხვევაში ეს დებულება განიხილება როგორც საარბიტრაჟო შეთანხმების განუყოფელი ნაწილი. ამასთან, თუ საარბიტრაჟო შეთანხმების რომელიმე ნაწილი ეწინააღმდეგება ამ დებულების რომელიმე წესს, მოქმედებს ამ დებულების შესაბამისი წესი.

2.6. პალატა, არბიტრაჟი და მხარეები მოქმედებენ ამ დებულების შესაბამისად. ამ დებულების რომელიმე წესის განმარტების, აგრეთვე ამ დებულებით მოუწესრიგებელი პროცედურული საკითხის გადაწყვეტის უფლებამოსილება აქვს პალატის თავმჯდომარეს არბიტრაჟის თავმჯდომარის ან რომელიმე მხარის მიმართვის საფუძველზე.

2.7. თუ ოდესმე აღმოჩნდება, რომ ამ დებულების რომელიმე ნაწილი ეწინააღმდეგება საქართველოს კანონმდებლობას ან იურიდიული ძალის არმქონეა, ეს ფაქტი გავლენას ვერ მოახდენს მისი დანარჩენი ნაწილებისა და მთლიანად დებულების იურიდიულ ძალასა და გამოყენებადობაზე.

2.8. იმ შემთხვევაში, თუ მხარეები შეთანხმდნენ დავა საარბიტრაჟო წესით გადაწყვიტონ ამ დებულების შესაბამისად, ითვლება, რომ მხარეები შეთანხმებულნი არიან არ მიმართონ სასამართლოს ან სხვა ორგანოს არბიტრაჟის კომპეტენციის ან უფლებამოსილების თაობაზე, გარდა იმ შემთხვევისა, როცა არსებობს ორივე მხარის წერილობითი შეთანხმება ან პალატის წინასწარი ნებართვა მოცემულ საკითხზე.

2.9. ამ დებულების მიხედვით პალატის საქმიანობას და მის ფუნქციებს პალატის სახელით ახორციელებს მისი თავმჯდომარე, თავმჯდომარის მოვალეობის შემსრულებელი ან თავმჯდომარის მიერ შექმნილი კოლეგია, რომელიც შედგება პალატის სამი ან ხუთი პარტნიორისაგან.

2.10. რეგისტრატორის ფუნქციებს მოცემული დებულების შესაბამისად ახორციელებს პალატის თავმჯდომარის მიერ დანიშნული რეგისტრატორი ან მისი მოვალეობის შემსრულებელი, რომელიც პალატას ექვემდებარება.

2.11. არბიტრები და მხარეები პალატას მიმართავენ რეგისტრატორის მეშვეობით.

III. ორგანიზაცია და საქმიანობა

3.1. არბიტრაჟი

3.1.1. არბიტრაჟი შედგება ერთი ან სამი არბიტრისაგან (გარდა ამ დებულების 3.1.7. პუნქტით განსაზღვრული შემთხვევისა), რომელთა არჩევისა და დანიშვნის პირობები და წესი ამ თავით განისაზღვრება.

3.1.2. არბიტრები აირჩევიან და ინიშნებიან მხოლოდ პალატის არბიტრთა სიიდან (გარდა ამ დებულების 3.1.9. პუნქტით განსაზღვრული შემთხვევისა), რომელსაც ადგენს პალატის საერთო კრება.

3.1.3. თუ საარბიტრაჟო შეთანხმებით არბიტრთა რაოდენობა ერთით ან სამით არის განსაზღვრული, არბიტრაჟის წევრთა რაოდენობა განისაზღვრება საარბიტრაჟო შეთანხმების მიხედვით, ყველა სხვა შემთხვევაში არბიტრაჟის წევრთა რაოდენობა

განისაზღვრება პალატის გადაწყვეტილებით მხარეთა სურვილისა და დავის სირთულის გათვალისწინებით.

3.1.4. არბიტრაჟის წევრების დანიშვნა პალატის განსაკუთრებული უფლებამოსილებათა. არბიტრთა შერჩევა ხდება კონკრეტული საქმის ყველა გარემოებისა და მხარეთა მიერ წარმოდგენილი იმ მოთხოვნებისა და კრიტერიუმების გათვალისწინებით, რომელთაც უნდა აკმაყოფილებდნენ არბიტრობის კანდიდატები.

3.1.5. ერთწევრიანი არბიტრაჟის შემთხვევაში არბიტრად ინიშნება მხარეთა მიერ ურთიერთშეთანხმებით არჩეული არბიტრი პალატის მიერ მათთვის წარდგენილი არბიტრთა სიიდან, რომლის შედგენაც ხდება ამ დებულების 3.1.4. პუნქტის შესაბამისად. მხარეთა შეუთანხმებლობის შემთხვევაში არბიტრს იმავე სიიდან ნიშნავს პალატა.

3.1.6. სამწევრიანი არბიტრაჟის შემთხვევაში არბიტრებად ინიშნებიან მხარეთა მიერ მათთვის წარდგენილი არბიტრთა სიიდან (რომლის შედგენაც ხდება ამ დებულების 3.1.4. პუნქტის შესაბამისად) არჩეული თითო არბიტრი და ამ არბიტრების მიერ იმავე სიიდან ურთიერთშეთანხმებით არჩეული მესამე არბიტრი, რომელიც ინიშნება არბიტრაჟის თავმჯდომარედ ; არბიტრთა შეუთანხმებლობის შემთხვევაში მესამე არბიტრს - არბიტრაჟის თავმჯდომარეს ნიშნავს პალატა. რომელიმე / ორივე მხარის წერილობით გამოხატული სურვილით მის / მათ მიერ ასარჩევ არბიტრს ნიშნავს პალატა. თუ მხარემ არ აირჩია არბიტრი პალატის მიერ დადგენილ ვადაში, მის ნაცვლად არბიტრს ნიშნავს პალატა.

3.1.7. თუ პალატა, დავის სირთულიდან გამომდინარე, საჭიროდ ჩათვლის და მხარეებიც თანხმობას განაცხადებენ, არბიტრაჟი შეიძლება შეიქმნას ხუთი არბიტრისაგან. ასეთ შემთხვევაში თითოეული მხარე ირჩევს ორ - ორ არბიტრს, ხოლო მეხუთე არბიტრი აირჩევა უკვე არჩეული არბიტრების მიერ არანაკლებ სამი ხმით და იგი ინიშნება არბიტრაჟის თავმჯდომარედ. თუ მათ ვერ აირჩიეს მეხუთე არბიტრი, მას - არბიტრაჟის თავმჯდომარეს ნიშნავს პალატა.

3.1.8. თუ დავაში მონაწილეობს ორზე მეტი მხარე, მაგრამ ყველა მხარემ წერილობით არ გამოხატა თანხმობა, რომ არბიტრაჟის შექმნის მიზნით დავის ყველა მონაწილე იყოფა ორ მხარედ - მოსარჩლედ და მოპასუხედ და არ გადანაწილდნენ ამ მხარეებად, პალატა ისე ნიშნავს არბიტრაჟს, რომ მხედველობაში არ იღებს მხარეთა წარდგენილ კანდიდატურებს. ასეთ შემთხვევაში მხარეთა საარბიტრაჟო შეთანხმება გაიგება როგორც მხარეთა შეთანხმება იმის თაობაზე, რომ არბიტრაჟს ნიშნავს პალატა.

3.1.9. თუ არსებობს მხარეთა წინასწარი შეთანხმება, რომლის თანახმადაც არბიტრს / არბიტრებს ნიშნავს / ნიშნავენ მხარე, მხარეები ან მხარეთა მიერ განსაზღვრული მესამე პირი, ამ დებულებით ასეთი შეთანხმება გაიგება როგორც მხარეთა შეთანხმება წარადგინონ არბიტრის / არბიტრების კანდიდატურა (და არა დანიშნონ არბიტრები). მხოლოდ პალატას შეუძლია დანიშნოს წარდგენილი კანდიდატურა არბიტრად, იმ პირობით, რომ ისინი აკმაყოფილებენ 3.1.10. პუნქტში მითითებულ მოთხოვნებს. პალატას შეუძლია უარი თქვას მხარეთა ან მესამე პირის მიერ წარდგენილი

არბიტრების დანიშვნაზე, თუ მიიჩნევს, რომ ისინი ვერ აკმაყოფილებენ ამ დებულების 3.1.4. პუნქტით განსაზღვრულ პირობებს ან არ არიან დამოუკიდებელი, ან არ არიან მიუკერძოებელი.

3.1.10. პალატის მიერ არბიტრების დანიშვნამდე ყოველმა არბიტრმა რეგისტრატორს უნდა წარუდგინოს თავისი ნამსახურობის ნუსხა, რომელშიც მითითებული უნდა იყოს ადრინდელი და ამჟამინდელი პროფესიული საქმიანობა და სამუშაოს ადგილი. არბიტრმა საარბიტრაჟო ხარჯისა და მოსაკრებლების შესახებ დებულების შესაბამისად ხელი უნდა მოაწეროს ჰონორარის შესახებ ხელშეკრულებას, აგრეთვე დეკლარაციას იმის შესახებ, რომ არ არსებობს მისთვის ცნობილი ისეთი გარემოებები, რომლებმაც შეიძლება საფუძვლიანი ეჭვი გამოიწვიოს არბიტრის მიუკერძოებლობასა და დამოუკიდებლობაში.

3.1.11. პალატა ნიშნავს არბიტრებს მას შემდეგ, როცა რეგისტრატორი დადგენილ ვადაში მიიღებს მოპასუხის შესაგებელს ან როცა გავა შესაგებლის წარმოდგენისათვის განსაზღვრული დრო. პალატას შეუძლია დაიწყოს არბიტრაჟის ფორმირება იმისდა მიუხედავად, რომ პრეტენზია არასრული იყო ან შესაგებელი არ იყო წარმოდგენილი.

3.1.12. თუ სამწევრიანი არბიტრაჟის ერთი წევრი ან ხუთწევრიანი არბიტრაჟის ერთი ან ორი წევრი სისტემატურად არ ასრულებს თავის მოვალეობას, დანარჩენ არბიტრებს უფლება აქვთ პალატისათვის, მხარეებისა და ამ არბიტრისათვის (არბიტრებისათვის) შეტყობინების შემდეგ გააგრძელონ საქმის განხილვა (ნებისმიერი გადაწყვეტილების მიღების უფლებით), მიუხედავად იმისა, რომ ეს არბიტრი (არბიტრები) არ მონაწილეობს საქმის განხილვაში.

3.1.13. პალატას უფლება აქვს უფლებამოსილება შეუწყვიტოს დანიშნულ არბიტრს და მის ნაცვლად დანიშნოს სხვა არბიტრი, თუ :

ა) არბიტრმა წერილობით განაცხადა, რომ არ სურს თავისი ფუნქციების შესრულება და ამ განცხადების პირი გადაეცა ყველა მხარესა და არბიტრაჟის დანარჩენ წევრებს (თუ არიან ასეთები) ;

ბ) არბიტრმა წერილობით განაცხადა თვითგანრიდების შესახებ და ამ განცხადების პირი გადაეცა ყველა მხარესა და არბიტრაჟის დანარჩენ წევრებს (თუ არიან ასეთები), ან არბიტრი სერიოზულად დაავადდა, ან თავისი ფუნქციების შესრულებისათვის უუნარო აღმოჩნდა და მისი უფლებამოსილების შეწყვეტა მოითხოვა ერთ - ერთმა მხარემ ან ითხოვეს დანარჩენმა არბიტრებმა ;

გ) მიიჩნევს, რომ არბიტრი განზრახ ან სისტემატურად არღვევს საარბიტრაჟო შეთანხმების პირობებს (მათ შორის ამ დებულებას), ან სამართლიანად და მიუკერძოებლად არ განიხილავს საქმეს, ან ჯეროვნად არ ასრულებს თავის ფუნქციებს.

არბიტრის გარდაცვალების შემთხვევაში პალატას უფლება აქვს დანიშნოს სხვა არბიტრი. ასეთ შემთხვევებში ახალი არბიტრი აირჩევა და ინიშნება იმავე წესითა და პირობებით, როგორც მისი წინამორბედი.

3.2. არბიტრის აცილება

3.2.1. არბიტრაჟის წევრები მხარეთაგან დამოუკიდებელი და მიუკერძოებელი უნდა იყვნენ და უნდა აკმაყოფილებდნენ საქართველოს კანონმდებლობით დადგენილ მოთხოვნებს. არბიტრაჟის წევრობის ნებისმიერი კანდიდატი, ისევე როგორც

თითოეული მხარე, ვალდებულია არბიტრაჟის დაკომპლექტებამდე სრულად გაუმხილოს პალატას ნებისმიერი გარემოება, რამაც შეიძლება საეჭვო გახადოს რომელიმე არბიტრის დამოუკიდებლობა და მიუკერძოებლობა ან გამოიწვიოს საქართველოს კანონმდებლობის დარღვევა.

3.2.2. ნებისმიერ მხარეს უფლება აქვს განაცხადოს არბიტრის აცილების შესახებ, თუ არსებობს გარემოებები, რომლებიც საფუძვლიან ეჭვს იწვევენ მათ მიუკერძოებლობასა და დამოუკიდებლობაში. აცილება შეიძლება გაცხადებულ იქნეს იმ შემთხვევაშიც, თუ არბიტრი არ ფლობს იმ კვალიფიკაციას, რომელიც შეთანხმებით არის განსაზღვრული.

3.2.3. ხანდაზმულობის ვადა არბიტრის აცილების მოთხოვნისთვის არის ერთი კვირა მხარისთვის არბიტრაჟის დაკომპლექტების შეტყობინების ან ახლად აღმოჩენილი გარემოების აღმოჩენის დღიდან, გარდა იმ შემთხვევისა, როდესაც აღმომჩენ მხარეს უნდა სცოდნოდა და განეცხადებინა ამ გარემოების შესახებ არბიტრაჟის დაკომპლექტების მომენტისათვის.

3.2.4. პალატამ უნდა განიხილოს არბიტრის მიუკერძოებლობის დამაეჭვებელი გარემოებები, ისევე როგორც არბიტრის აცილების მოთხოვნის ყოველი ცალკეული შემთხვევა და მიიღოს შესაბამისი გადაწყვეტილება. პალატამ შეიძლება განიხილოს ხანდაზმულობის ვადის დარღვევით გაცხადებული აცილების მოთხოვნაც და ასეთი მოთხოვნის დაკმაყოფილების შემთხვევაში არბიტრაჟი უფლებამოსილია, რომ აცილებული არბიტრის გასამრჯელო ან მისი ნაწილი დააკისროს განმცხადებელ მხარეს.

3.2.5. ამ დებულების 3.2.2 პუნქტში აღნიშნული საფუძვლით შეიძლება აცილებულ იქნენ საქმის განხილვაში მონაწილე ექსპერტები, თარჯიმნები და სპეციალისტები. ამ შემთხვევაში აცილების საკითხს წყვეტს არბიტრაჟი.

3. საარბიტრაჟო განხილვის ენა

3.3.1. საარბიტრაჟო განხილვა, როგორც წესი, იმ ენაზე ხდება, რომელსაც მხარეები მიუთითებენ საარბიტრაჟო შეთანხმებაში.

3.3.2. თუ მხარეთა საარბიტრაჟო შეთანხმებაში აღნიშნული არ არის საარბიტრაჟო განხილვის ენა, საარბიტრაჟო განხილვა იმართება მხარეთა საარბიტრაჟო შეთანხმების ენაზე, ხოლო თუ საარბიტრაჟო შეთანხმება ერთზე მეტ ენაზეა, მაშინ იმ ენაზე, რომელსაც ენიჭება უპირატესობა.

3.3.3. თუ რაიმე მიზეზის გამო არ ხერხდება ენის გარკვევა ან არც ერთი ენის გამოყენება, საარბიტრაჟო განხილვა იმართება ქართულ ენაზე.

3.4. საარბიტრაჟო განხილვის ადგილი

3.4.1. არბიტრაჟი უფლებამოსილია, პალატასთან შეთანხმებით, სხდომებისა და

მოსმენების გამართვის, მტკიცებულებების, დათვალიერების ან სხვა მიზნით
შეიკრიბოს ნებისმიერ ადგილას საჭიროებისა და თავისი შეხედულებისამებრ.

3.4.2. მიუხედავად არბიტრაჟის გამართვის ფაქტობრივი ადგილისა, საარბიტრაჟო განხილვის ადგილად მიიჩნევა საარბიტრაჟო შეთანხმებაში საქართველოს ტერიტორიის ფარგლებში მითითებული ადგილი.

3.4.3. თუ საარბიტრაჟო შეთანხმება არ ასახელებს საარბიტრაჟო განხილვის ადგილს ან მასში მითითებული ადგილი საქართველოს ფარგლებს გარეთაა, საარბიტრაჟო განხილვის ადგილად მიიჩნევა არბიტრაჟის იურიდიული მისამართი.

3.4.4. საარბიტრაჟო განხილვის ადგილი წარმოადგენს საარბიტრაჟო გადაწყვეტილების მიღების ადგილს.

3.5. გამოსაყენებელი სამართალი

3.5.1. საარბიტრაჟო შეთანხმების იურიდიული ძალისა და არბიტრაჟის იურისდიქციის დადგენისას არბიტრაჟი გამოიყენებს მხარეთა მიერ მითითებულ სამართალს, ხოლო თუ მითითებული არ არის, - საქართველოს სამართალს.

3.5.2. საარბიტრაჟო განხილვის პროცედურის მიმართ გამოიყენება საქართველოს სამართალი.

3.5.3. არბიტრაჟმა უნდა დაადგინოს სამართალი, რომლის მიხედვითაც უნდა მოხდეს დავის მატერიალური სამართლის საკითხების გადაწყვეტა მხარეთა არჩევანის ან "საერთაშორისო კერძო სამართლის შესახებ" საქართველოს კანონის საფუძველზე.

3.6. კონფიდენციალობა

3.6.1. პალატა, არბიტრაჟი, მხარეები, ისევე როგორც საარბიტრაჟო განხილვის მონაწილე ექსპერტები, მოწმეები და სხვა პირები ვალდებული არიან სრული საიდუმლოებით შეინახონ ნებისმიერი ინფორმაცია, რაც მათთვის ცნობილი გახდა საარბიტრაჟო განხილვაში მათი მონაწილეობის შედეგად, თუ მხარეები სხვა რამეზე არ შეთანხმდებიან.

3.6.2. თუ მხარეები სხვა რამეზე არ შეთანხმდებიან, საარბიტრაჟო გადაწყვეტილების გამხელა შეიძლება მხოლოდ სასამართლოსთვის, სხვა კომპეტენტური ორგანოებისა და პირებისთვის გადაწყვეტილების აღსრულების, მისი შედეგების დადასტურების აუცილებლობის და / ან კანონით გათვალისწინებულ შემთხვევებში.

3.7. კომუნიკაცია პალატას, არბიტრაჟს და მხარეთა შორის

3.7.1. პალატას, არბიტრაჟსა და მხარეთა შორის კომუნიკაცია არის წერილობითი და სრულდება საარბიტრაჟო განხილვის ენაზე.

3.7.2. შეტყობინება გაგზავნილად ჩაითვლება, თუ ის ადრესატს პირადად ჩაბარდა ან გაიგზავნა რეგისტრირებული ფოსტით, ტელექსის, ტელეფაქსის ან სხვა სატელეკომუნიკაციო საშუალებით, რომელიც იძლევა გაგზავნის დადასტურების ჩანაწერს.

3.7.3. შეტყობინება უნდა გაიგზავნოს ადრესატის მიერ სპეციალურად მითითებულ საკომუნიკაციო მისამართზე. ასეთი მისამართის არარსებობის შემთხვევაში შეტყობინება უნდა გაიგზავნოს ადრესატის პალატისათვის ცნობილი საბოლოო საცხოვრებელი ან საქმიანობის ადგილის მისამართზე.

3.7.4. თუკი არსებობს გაგზავნის დადასტურება, შეტყობინება მიღებულად (მიწოდებულად) ჩაითვლება იმ დღეს, როცა ის პირადად ჩაბარდა ადრესატს ან ადრესატს უნდა მიეღო გამოყენებული საკომუნიკაციო საშუალების სახეობიდან გამოდინარე.

3.7.5. მიუხედავად ზემოთქმულისა, ნებისმიერ მხარეს შეუძლია მეორე მხარეს გაუგზავნოს შეტყობინება იმ წესით, რომელიც განსაზღვრულია მათი წერილობითი შეთანხმებით, ხოლო ასეთის არარსებობის შემთხვევაში - მხარეთა შორის ჩამოყალიბებული პრაქტიკით, ან სხვა წესებით, რომელსაც განსაზღვრავს არბიტრაჟი.

3.7.6. არბიტრაჟის ფორმირებამდე მხარეთა და არბიტრებს შორის ყველა კავშირი ხორციელდება რეგისტრატორის მეშვეობით.

3.7.7. არბიტრაჟის ფორმირების შემდეგ, თუ იგი აუცილებლად არ მიიჩნევა პირდაპირ კავშირს მხარეთა და არბიტრაჟს შორის, მთელი წერილობითი ინფორმაცია მათ შორის გადაიცემა რეგისტრატორის მეშვეობით.

3.7.8. თუ რეგისტრატორი პალატის სახელით უგზავნის რომელიმე მხარეს წერილობით შეტყობინებას, მაშინ მან სხვა მხარეებსაც უნდა გაუგზავნოს ამ დოკუმენტის ასლი. როცა რომელიმე მხარე რეგისტრატორს უგზავნის რაიმე შეტყობინებას (წერილობითი განცხადებებისა და დოკუმენტების ჩათვლით), მაშინ მხარე ვალდებულია დაურთოს მას ამ დოკუმენტების ასლები ყოველი არბიტრისათვის, გაუგზავნოს ასლები ყველა დანარჩენ მხარეს და რეგისტრატორს წერილობით დაუდასტუროს, რომ მან ეს უკვე გააკეთა ან რომ ეს უკვე კეთდება.

IV. საარბიტრაჟო განხილვის ხარჯი

4.1. საარბიტრაჟო განხილვის ხარჯი შედგება სარეგისტრაციო მოსაკრებლის, საარბიტრაჟო მოსაკრებლისა და არბიტრაჟის დამატებითი ხარჯისაგან (ექსპერტიზის ხარჯი, ექსპერტებისა და თარჯიმნების ჰონორარი, არბიტრებისა და მათი გადაადგილების ხარჯი და სხვ.)

4.2. სარეგისტრაციო მოსაკრებელს მოდავე მხარე იხდის საარბიტრაჟო პრეტენზიის წარდგენასთან ერთად, რის გარეშეც პალატა საარბიტრაჟო პრეტენზიას არ მიიღებს. ამასთან, არბიტრაჟის მიერ დავის მიუღებლობის შემთხვევაში სარეგისტრაციო მოსაკრებელი დაბრუნებას არ ექვემდებარება, თანახმად საარბიტრაჟო ხარჯისა და მოსაკრებლების შესახებ დებულებისა, რომელიც ამ დებულების განუყოფელი ნაწილია (იხ. დანართი).

4.3. პალატამ მხარეებს შეიძლება განუსაზღვროს საავანსო თანხის ოდენობა, რომელიც შეიტანება პალატის ანგარიშზე.

4.4. არბიტრაჟი არ იწყებს საარბიტრაჟო განხილვას, თუ რეგისტრატორისგან არ მიიღებს დადასტურებას იმის შესახებ, რომ პალატას გააჩნია საკმარისი ფონდი მოცემული საქმის განსახილველად.

4.5. საარბიტრაჟო განხილვის ხარჯის გადახდას არბიტრაჟი დააკისრებს მთლიანად ერთ - ერთ მხარეს ან მხარეებს გარკვეული პროპორციით. არბიტრაჟის გადაწყვეტილება საარბიტრაჟო განხილვის ხარჯის დაკისრების შესახებ საარბიტრაჟო გადაწყვეტილების შემადგენელი ნაწილია.

4.6. თუ პალატის მიერ საარბიტრაჟო გადაწყვეტილების საბოლოო ხელმოწერელი ვარიანტის მიღებისას აღმოჩნდება, რომ ამ დებულების 6.1 მუხლის შესაბამისად გადახდილი საავანსო თანხა აღემატება საარბიტრაჟო განხილვის ხარჯის დაკისრებულ ოდენობას, განსხვავება დაუბრუნდება ერთ - ერთ ან ორივე მხარეს (გარკვეული პროპორციით) დაკისრების შესახებ გადაწყვეტილების შესაბამისად. თუ საავანსო თანხა დაკისრებულ თანხაზე ნაკლებია, მხარეებმა დაუყოვნებლივ უნდა დაფარონ განსხვავება. არბიტრაჟის წევრები საარბიტრაჟო გადაწყვეტილებას ხელს აწერენ მხოლოდ მას შემდეგ, როცა პალატისაგან მიიღებენ შეტყობინებას, რომ საარბიტრაჟო ხარჯი სრული ოდენობითაა დაფარული მხარეთა მიერ.

4.7. საარბიტრაჟო განხილვის ხარჯის გარდა, არბიტრაჟის გადაწყვეტილებით ერთ - ერთ მხარეს შეიძლება დაეკისროს მეორე მხარის მიერ საარბიტრაჟო განხილვასთან დაკავშირებით გაწეული იურიდიული ხარჯების მთლიანად ან მისი გარკვეული ნაწილის ანაზღაურება.

4.8. თუ სარჩელის (ან შეგებებული სარჩელის) აღმძვრელი მხარე სრულად არ გადაიხდის მისთვის დადგენილ ავანსს, არბიტრაჟი ამას მიიჩნევს სარჩელზე (შეგებებულ სარჩელზე) უარის თქმად.

V. საქმის მომზადება საარბიტრაჟო განხილვისათვის

1. საარბიტრაჟო წარმოების წარმართვა

5.1.1. მხარეებს უფლება აქვთ (და რეკომენდებულია), რომ თავისი შეხედულებისამებრ შეთანხმდნენ საარბიტრაჟო განხილვის პროცედურაზე, ოღონდ იმ პირობით, რომ ისინი განუხრელად დაიცავენ საარბიტრაჟო წარმოების შემდეგ საერთო წესებს :

ა) ყველა მხარის მიმართ სამართლიანი და მიუკერძოებელი დამოკიდებულების უზრუნველყოფა, თითოეული მხარის მიმართ თავისი პოზიციის გადმოცემის საკმარისი შესაძლებლობისა და ოპონენტის პოზიციის გაქარწყლების საშუალების მიცემა ;

ბ) ისეთი პროცედურის დადგენა, რომელიც შეესაბამება მოცემული განხილვის გარემოებებს, უსაფუძვლო შეფერხებებისა და ხარჯის თავიდან აცილება და ამგვარად დავის საბოლოო სამართლიანი და ეფექტური გზით გადაწყვეტის უზრუნველყოფა.

5.1.2. მხარეთა ასეთი შეთანხმება შედგენილი უნდა იყოს წერილობით ან მხარეთა თხოვნითა და თანხმობით პალატის მიერ უნდა იყოს დოკუმენტირებული.

5.1.3. იმ შემთხვევაში, როცა მხარეთა შორის არ არსებობს 5.1.1 პუნქტის შესაბამისად დადგენილი შეთანხმება, არბიტრაჟს სრული უფლება აქვს თავისი შეხედულებისამებრ შეასრულოს თავისი მოვალეობა იმ წესის (წესების) შესაბამისად, რომელსაც იგი ჩათვლის გამოყენებადად, ხოლო მხარეები ვალდებული არიან დროულად მიიღონ მათზე დამოკიდებული ყველა აუცილებელი ზომა საარბიტრაჟო განხილვის სამართლიანი, ეფექტური და სწრაფი განხილვის უზრუნველსაყოფად.

5.1.4. იმ შემთხვევაში, როცა არბიტრაჟი მოქმედებს ერთზე მეტი არბიტრის შემადგენლობით, არბიტრაჟის თავმჯდომარეს სხვა დანარჩენი არბიტრების წინასწარი თანხმობით, შეუძლია ერთპიროვნულად მიიღოს გადაწყვეტილება საქმის განხილვის საპროცესო საკითხებზე.

5.2. საარბიტრაჟო პრეტენზია

5.2.1. მოდავე მხარემ, რომელსაც სურს, რომ დავა განიხილოს არბიტრაჟმა, წერილობითი საარბიტრაჟო პრეტენზიით უნდა მიმართოს პალატას. საარბიტრაჟო პრეტენზია უნდა შეიცავდეს შემდეგ ინფორმაციას :

ა) მხარეთა სრულ დასახელებასა და მათ იურიდიულ მისამართებს ;

ბ) დავის საგნის მოკლე აღწერას ;

გ) საარბიტრაჟო შეთანხმებას მხარეთა შორის, თუ ასეთი არსებობს ;

დ) ყველა იმ დოკუმენტის ასლსა და ინფორმაციას, რომლებიც აქვს მოდავე მხარეს და კავშირშია დავის საგანთან ;

ე) მოდავე მხარის მოთხოვნას ;

ვ) პრეტენზიის ფასს ;

ზ) არბიტრებისა და სათადარიგო არბიტრების სახელს, გვარს, პროფესიას, საფოსტო მისამართს და სხვა კოორდინატებს ;

თ) საარბიტრაჟო განხილვასთან დაკავშირებულ სხვა საკითხებს (ადგილმდებარეობას, ენას (ენებს), არბიტრების რაოდენობას, მათი შერჩევის პროცესს და ა. შ.) ;

ი) საარბიტრაჟო ხარჯისა და მოსაკრებლების შესახებ დებულებით გათვალისწინებული სარეგისტრაციო მოსაკრებლის გადახდის დამადასტურებელ საბუთს, რომლის გარეშეც პრეტენზია არ ჩაითვლება მიღებულად და საარბიტრაჟო განხილვა არ დაიწყება.

5.2.2. თუ პრეტენზია არ აკმაყოფილებს 5.2.1. პუნქტით დადგენილ მოთხოვნებს, მოსარჩლემ რეგისტრატორის მიერ მითითებულ ვადაში უნდა გამოასწოროს არსებული

ხარვეზები. ამ ვადაში ხარვეზების გამოუსწორებლობის შემთხვევაში პალატას გამოაქვს გადაწყვეტილება საქმის შეწყვეტის შესახებ.

5.2.3. პალატის მიერ პრეტენზიის მიღება ითვლება საარბიტრაჟო წარმოების დაწყებად. იმ შემთხვევაში, როცა გათვალისწინებულია მხოლოდ ერთი არბიტრის დანიშვნა, პრეტენზია (ყველა დოკუმენტთან ერთად) პალატას გადაეცემა ორ ეგზემპლარად, ხოლო თუ მოსარჩლე აპირებს, ან მხარეები შეთანხმდნენ, რომ სამი არბიტრი იქნება დანიშნული, მაშინ პრეტენზია წარმოდგენილ უნდა იქნეს ოთხ ეგზემპლარად.

5.2.4. პალატა, საარბიტრაჟო პრეტენზიის მიღებიდან სამი სამუშაო დღის ვადაში, საარბიტრაჟო პრეტენზიის და ამ დებულების ასლებს გაუგზავნის მოპასუხე მხარეს.

5.3. პასუხი საარბიტრაჟო პრეტენზიაზე

5.3.1. მოპასუხე მხარემ საარბიტრაჟო პრეტენზიის და ამ დებულების ასლების მიღებიდან ერთი კვირის ვადაში პალატას უნდა მიაწოდოს თავისი პასუხი საარბიტრაჟო პრეტენზიაზე. პალატა უფლებამოსილია მოპასუხე მხარის მოთხოვნის საფუძველზე გააგრძელოს აღნიშნული ვადა მხოლოდ ერთხელ, არა უმეტეს ერთი კვირის ვადით.

5.3.2. საარბიტრაჟო პრეტენზიაზე პასუხი უნდა შეიცავდეს :

ა) კომენტარს მოდავე მხარის მიერ დავის საგნის აღწერაზე, იმ ნაწილების მითითებით, რომლებსაც მოპასუხე არ ეთანხმება ან უარყოფს ;

ბ) დოკუმენტების ასლებს ან ინფორმაციას, რაც არ არის საარბიტრაჟო პრეტენზიაში და კავშირშია დავასთან ;

გ) კომენტარს მოდავე მხარის მოთხოვნაზე ;

დ) ნებისმიერ შეგებულ პრეტენზიას (თუ ასეთი არსებობს), რომელიც მოპასუხე მხარეს აქვს ამ მოდავე მხარის მიმართ ;

ე) არბიტრების და სათადარიგო არბიტრების სახელსა და გვარს, საფოსტო მისამართს და სხვა კოორდინატებს ;

ვ) საარბიტრაჟო განხილვასთან დაკავშირებულ სხვა საკითხებს (ადგილმდებარეობას, ენას (ენებს), არბიტრების რაოდენობას, მათი შერჩევის პირობებს და ა. შ.).

5.3.3. შესაგებლის გაუგზავნელობა მოპასუხეს უფლებას არ ართმევს უარყოს პრეტენზიის მოთხოვნები ან გამოვიდეს შეგებული პრეტენზიით საარბიტრაჟო განხილვისას. ამასთან, თუ საარბიტრაჟო შეთანხმებით გათვალისწინებულია მხარეთა მიერ არბიტრაჟის კანდიდატურების წარდგენა, შესაგებლის გაუგზავნელობა განიხილება როგორც უარი მოცემული მხარის მიერ არბიტრის არჩევის შესაძლებლობაზე.

5.4. პროტენზიის ფასის განსაზღვრა

5.4.1. პროტენზიის ფასი განისაზღვრება :

- ა) თანხის ანაზღაურების პრეტენზიაზე - მოთხოვნილი თანხით ;
- ბ) ქონების გამოთხოვის პრეტენზიაზე - გამოსათხოვი ქონების ღირებულებით ;
- გ) გარკვეული მოქმედების ან უმოქმედობის შესახებ პრეტენზიაზე მოსარჩელის ქონებრივი ინტერესების შესაბამისად.

მოსარჩლე ვალდებულია პრეტენზიის ფასი მიუთითოს იმ შემთხვევაშიც, როცა პრეტენზია ან მის ნაწილი არ ატარებს ქონებრივ ხასიათს.

5.4.2. პრეტენზიაში, რომელიც შედგება რამოდენიმე მოთხოვნისაგან, თითოეული მოთხოვნის ღირებულება ცალ - ცალკე უნდა განისაზღვროს. ასეთ შემთხვევაში სარჩელის ფასი განისაზღვრება ყველა მოთხოვნის საერთო ღირებულებით.

5.4.3. თუ მოსარჩლემ არ განსაზღვრა ან არასწორად განსაზღვრა პრეტენზიის ფასი, მაშინ პალატა თავისი ინიციატივით ან მოპასუხის მოთხოვნით განსაზღვრავს სარჩელის ფასს არსებული მონაცემების საფუძველზე.

VI. საარბიტრაჟო განხილვა

6.1. საარბიტრაჟო განხილვის დაწყება

6.1.1. პალატა ვალდებულია მოპასუხე მხარის შესაგებლისათვის განკუთვნილი ვადის ამოწურვიდან ერთი კვირის ვადაში ოფიციალურად მიიღოს გადაწყვეტილება საარბიტრაჟო განხილვისათვის დავის მიღების, ან მიღებაზე უარის თქმის შესახებ უარის მიზეზის მითითებით. მოდავე მხარეებს მიეწოდებათ გადაწყვეტილების თითო ასლი.

6.1.2. საარბიტრაჟო განხილვისათვის დავის მიღების გადაწყვეტილებაში პალატამ უნდა მიუთითოს საარბიტრაჟო ხარჯის საავანსო თანხის ოდენობა. საავანსო თანხა უნდა დაიფაროს მთლიანად ერთ - ერთი მხარის მიერ, ან მხარეთა მიერ მათ შორის შეთანხმებული პროპორციით, მხარეთა მიერ გადაწყვეტილების მიღებიდან ერთი კვირის განმავლობაში.

6.1.3. არბიტრაჟის შექმნა ამ დებულების III თავის შესაბამისად დაიწყება მხარეთა მიერ საავანსო თანხის სრული ოდენობით დაფარვის შემდეგ. პალატა უფლებამოსილია აღნიშნული თანხის ან მისი ნაწილის ნაცვლად მიიღოს საბანკო ან მისთვის მისაღები სხვა გარანტია. ამასთან, საავანსო თანხის გადაუხდელობა, დაგვიანებით გადახდა ან ზემოაღნიშნული გარანტიის წარმოუდგენლობა საკმარისი საფუძველია საარბიტრაჟო განხილვისათვის დავის მიღების გადაწყვეტილების გასაუქმებლად.

6.2. საარბიტრაჟო განხილვის ზოგადი წესები

6.2.1. ყოველი არბიტრაჟი დამოუკიდებლად წყვეტს თავისი მუშაობის წესს ამ

დებულების შესაბამისად და მხარეთა ერთობლივ მოთხოვნათა გათვალისწინებით.

6.2.2. არბიტრაჟი, როგორც საპროცესო, ასევე დავის ფაქტობრივ და სამართლებრივ საკითხებზე გადაწყვეტილებებს იღებს ხმათა უმრავლესობით. ამასთან, საპროცესო

საკითხებზე უმრავლესობის არარსებობის შემთხვევაში არბიტრაჟის თავმჯდომარეს აქვს ერთპიროვნული გადაწყვეტილების მიღების უფლებამოსილება.

6.2.3. არბიტრაჟის სხდომები დახურულია, თუ ორივე მხარე არ მოითხოვს ღია განხილვის გამართვას.

6.2.4. მხარეებს გონივრულ ვადაში უნდა ეცნობოთ მოსმენის გამართვის დრო და ადგილი, რათა მათ მოახერხონ ასეთ მოსმენაზე გამოცხადება.

6.2.5. თუ საარბიტრაჟო შეთანხმება ითვალისწინებს და არბიტრაჟი ამას მისაღებად ჩათვლის, საარბიტრაჟო განხილვა შეიძლება წარიმართოს მხოლოდ წერილობითი მასალის საფუძველზე მხარეთა ზეპირი მოსმენის გარეშე.

6.2.6. არბიტრაჟს ზეპირი მოსმენის დაწყებამდე შეუძლია მხარეებს გადასცეს შეკითხვების სია, რომლებზეც მას განსაკუთრებულად და დაწვრილებით სურს მათგან პასუხის მოსმენა.

6.2.7. საარბიტრაჟო გადაწყვეტილების გამოტანამდე არბიტრაჟმა ყოველი ღონე უნდა იხმაროს დავასთან დაკავშირებული ამომწურავი ინფორმაციის მისაღებად, რისთვისაც, საჭიროების შემთხვევაში, პალატის მეშვეობით მოხდება მოწმეთა გამოძახება, ექსპერტთა მოწვევა, მტკიცებულებათა გამოთხოვა და ა. შ.

6.2.8. მხარეები საქმეებს აწარმოებენ უშუალოდ ან წარმომადგენლების მეშვეობით. მხარის გამოუცხადებლობა, თუ მას ამ დებულებით დადგენილი წესითა და ვადაში ეცნობასაქმის განხილვის დროისა და ადგილის თაობაზე, ხელს არ უშლის საქმის განხილვას და გადაწყვეტილების მიღებას, თუ გამოუცხადებელმა მხარემ წერილობით არ იშუამდგომლა განხილვის გადადება საპატიო მიზეზის მითითებით. მხარეს შეუძლია მოითხოვოს საქმის განხილვა მის დაუსწრებლად.

6.2.9. ნებისმიერ მხარეს შეუძლია საქმის განხილვის დამთავრებამდე შეცვალოს ან შეავსოს თავისი სასარჩელო მოთხოვნები ან შესაგებელი, რომლის დასაშვებობის საკითხს წყვეტს არბიტრაჟი.

6.2.10. მხარეებმა უნდა დაამტკიცონ ის გარემოებანი, რომლებზეც ისინი ამყარებენ თავიანთ მოთხოვნებს. არბიტრაჟს შეუძლია მხარეებს მოსთხოვოს სხვა მტკიცებულებათა წარმოდგენაც.

6.2.11. მესამე მხარეების საქმეში დაშვება შესაძლებელია ერთ - ერთი მხარის მოთხოვნით. მესამე პირის ჩასართავად, მეორე მხარის თანხმობის გარდა, აუცილებელია ამ პირის წერილობითი თანხმობაც.

6.2.12. მესამე პირის ჩართვა შესაძლებელია მხოლოდ საქმის მომზადების სტადიაზე. საპატიო მიზეზის არსებობის შემთხვევაში იგი შესაძლებელია საქმის განხილვის

შემდეგ სტადიაზეც იქნეს ჩართული. მესამე პირის საქმეში დამწებების საკითხს წყვეტს არბიტრაჟი.

6.2.13. არბიტრაჟს სრული უფლება აქვს დაადგინოს ყველა სხდომისა და მოსმენის ან მათი ნაწილის ხანგრძლივობა.

6.2.14. ნებისმიერი მოსმენის დაწყებამდე არბიტრაჟი უფლებამოსილია მოითხოვოს ნებისმიერი მხარისაგან იმ მოწმეთა შესახებ წინასწარი ინფორმაციის წარმოდგენა, რომლის გამოძახებასაც მხარე აპირებს. ინფორმაციაში უნდა აისახოს მათი ჩვენების საგანი და საარბიტრაჟო განხილვასთან მისი კავშირი.

6.2.15. არბიტრაჟს შეუძლია დაადგინოს დრო და ფორმა, რა დროშიც და რა ფორმითაც უნდა წარედგინოს ასეთი ინფორმაცია არბიტრაჟს, ასევე შეუძლია განსაზღვროს მოწმის (მოწმეთა) გამოსვლის დრო და ნებისმერ დროს შეაწყვეტინოს მას ჩვენების მიცემა, თუ იგი სცილდება კონკრეტულ შემთხვევაში განსახილველ საკითხებს.

6.2.16. თუ არბიტრაჟი სხვაგვარად არ დაადგენს, მოწმის (მოწმეთა) ჩვენება ნებისმიერი მხარის მიერ შეიძლება წარმოდგენილ იქნეს წერილობით. ამასთან, ნებისმიერ მხარეს შეუძლია შუამდგომლობით მიმართოს არბიტრაჟს, რათა მოწმე, რომლის ჩვენებაც წერილობით იყო წარმოდგენილი, გამოძახებულ იქნეს საქმის ზეპირ მოსმენაზე. იმ შემთხვევაში, თუ გამოძახებული მოწმე არ გამოცხადდება საპატიო მიზეზების გარეშე, არბიტრაჟი თავისი შეხედულებისამებრ წყვეტს ამ მოწმის წერილობითი ჩვენების მტკიცებულებად მიღების საკითხს.

6.2.17. ნებისმიერი მოწმე, რომელიც ზეპირ ჩვენებას იძლევა, შეიძლება დაკითხულ იქნეს ნებისმიერი მხარის მიერ. ამასთან, არბიტრაჟს ნებისმიერ დროს შეუძლია დაუსვას შეკითხვები მოწმეს ჩვენების მიცემის დროს.

6.2.18. თუ მხარეები სხვა რამეზე არ შეთანხმებულან, არბიტრაჟს შეუძლია თავისი ინიციატივით დანიშნოს ერთი ან რამდენიმე ექსპერტი კონკრეტულ საკითხზე არბიტრაჟისათვის დასკვნის მისაცემად.

6.2.19. არბიტრაჟს შეუძლია ნებისმიერ მხარეს მოსთხოვოს ექსპერტისათვის წარსადგენი აუცილებელი ინფორმაცია და დოკუმენტაცია, რომელიც მოცემულ მხარესთან ინახება და მხარე ვალდებულია არბიტრაჟის მიერ განსაზღვრულ დროში წარმოადგინოს ასეთი ინფორმაცია ან / და დოკუმენტაცია.

6.2.20. თუ მხარეები სხვა რამეზე არ შეთანხმებულან, ნებისმიერ მხარეს შეუძლია მოითხოვოს ექსპერტის (ექსპერტების) მოწვევა ზეპირ განხილვაზე მის (მათ) მიერ წარმოდგენილი დასკვნის გამო მხარეებსა და არბიტრაჟს უფლება აქვთ დაუსვან მას (მათ) შეკითხვები მათთვის საინტერესო საკითხებზე.

6.2.21. არბიტრაჟის მიერ დანიშნული ნებისმიერი ექსპერტის ჰონორარი და ხარჯი ამ დებულების შესაბამისად გადაიხდება მხარეთა მიერ შემოტანილი ავანსების ხარჯზე, რომელიც შედის საარბიტრაჟო განხილვის ხარჯში.

6.3. არბიტრაჟის დამატებითი უფლებამოსილებანი

6.3.1. თუ მხარეები სხვა რამეზე წერილობით არ შეთანხმებულან, მათ მიერ თავიანთი მოსაზრებების ჩამოყალიბების შემდეგ არბიტრაჟი უფლებამოსილია :

ა) გადაწყვეტოს ნებისმიერი საკითხი, რომელიც დაკავშირებულია ხარჯის განაწილებასთან ;

ბ) გააგრძელოს ან შეამციროს ნებისმიერი ვადა, რომელიც გათვალისწინებულია საარბიტრაჟო შეთანხმებით, ამ დებულებით ან არბიტრაჟის საკუთარი გადაწყვეტილებით ;

გ) დაავალდებულოს ნებისმიერი მხარე წარმოადგინოს ექსპერტიზისათვის საჭირო ნივთი და დოკუმენტაცია, რომელიც ამ მხარის კონტროლის ქვეშ იმყოფება, აგრეთვე ყველა ის დოკუმენტი, რასაც კონკრეტული საქმის განხილვისას არბიტრაჟი საჭიროდ მიიჩნევს ;

დ) მიიღოს გადაწყვეტილება მტკიცების ან სხვა წესების გამოყენების თუ გამოუყენებლობის შესახებ, რომლებიც ეხება საქმისათვის ნებისმიერი დოკუმენტის დაშვებას, შემხებლობას და მნიშვნელობას, აგრეთვე ნებისმიერი ფაქტის, საკითხის და ექსპერტის აზრის შესახებ და განსაზღვროს მხარეთა შორის დოკუმენტების გაცვლის დრო და ფორმა ;

ე) განსაზღვროს მხარეთა შორის დადებული ნებისმიერი კონტრაქტისა და საარბიტრაჟო შეთანხმების შესწორების პროცედურა, რომელიც აუცილებელია რაიმე შეცდომის გამოსასწორებლად, რომელსაც არბიტრაჟი მხარეთა საერთო ინტერესად მიიჩნევს, ოღონდ იმ ფარგლებში, რაც დაშვებულია ამ კონტრაქტისთვის ან / და საარბიტრაჟო შეთანხმებისთვის მარეგულირებელი კანონმდებლობით.

6.3.2. იმ შემთხვევაში, თუ მხარეები შეთანხმდნენ დავის განხილვაზე ამ დებულების შესაბამისად, მაშინ იგულისხმება, რომ მხარეები შეთანხმებულნი არიან არ მიმართონ არცერთი ქვეყნის სასამართლოს ან სასამართლო ორგანოს არანაირ გადაწყვეტილებაზე, რომელიც პალატის კომპეტენციას მიეკუთვნება, გარდა იმ შემთხვევებისა, როცა მხარეები წერილობით არიან სხვა რამეზე შეთანხმებულნი.

4. უზრუნველყოფის ზომები

6.4.1 იმ შემთხვევაში, თუ მხარეები სხვა რამეზე არ შეთანხმებულან, მოსარჩლის შუამდგომლობით არბიტრაჟს გამოაქვს გადაწყვეტილება პრეტენზიის უზრუნველყოფის ღონისძიებების შესახებ, რომელიც შეიძლება გამოიხატოს ავანსის შეტანით, საბანკო გარანტიის წარმოდგენით ან ნებისმიერი სხვა საშუალებით, რომელსაც არბიტრაჟი ჩათვლის საჭიროდ. ეს პირობები შეიძლება შეიცავდეს მოპასუხის მოთხოვნას მოსარჩელის მხრიდან ასეთი უზრუნველყოფის წარმოდგენით მოსალოდნელი ზარალის მიღების უზრუნველყოფის შესახებ.

მოპასუხის მოთხოვნით არბიტრაჟს შეუძლია მოსარჩელისაგან მოითხოვოს მოპასუხისათვის მოსალოდნელი ზარალის ანაზღაურების უზრუნველყოფა.

6.4.2. ერთ - ერთი მხარის მოთხოვნით მტკიცებულებათა უზრუნველყოფის მიზნით

არბიტრაჟი უფლებამოსილია მიიღოს შესაბამისი გადაწყვეტილება.

VII. საქმის წარმოების გადადება და შეჩერება

7.1. აუცილებლობის შემთხვევაში არბიტრაჟის ან მხარეთა ინიციატივით შეიძლება გადაიდოს ან შეჩერდეს საქმის განხილვა. გადაწყვეტილებას საქმის გადადების ან შეჩერების შესახებ იღებს არბიტრაჟი დადგენილების სახით.

VIII. საარბიტრაჟო გადაწყვეტილება

8.1. არბიტრაჟმა საარბიტრაჟო გადაწყვეტილების საბოლოო ხელმოუწერელი ვარიანტი უნდა მიაწოდოს პალატას საარბიტრაჟო განხილვის დაწყებიდან არა უგვიანეს ერთი თვისა, თუ მხარეთა მიერ წინასწარ არ არის დადგენილი საბოლოო გადაწყვეტილების გამოტანის სხვა ვადა.

8.2. თუ მხარეები არ შეთანხმებულან გადაწყვეტილების გამოტანის ვადაზე და გადაწყვეტილება გამოტანილი არ იქნა 8.1 მუხლში მითითებულ ვადაში, არბიტრაჟი უნდა გადადგეს, თუ მხარეთა მიერ სხვა რამ არ იქნა დადგენილი. ამ შემთხვევაში მხარეები ვალდებული არიან 10 დღის ვადაში დანიშნონ არბიტრაჟის ახალი წევრები ამ დებულების III თავის შესაბამისად.

8.3. საარბიტრაჟო გადაწყვეტილების საბოლოო ხელმოუწერელი ვარიანტი ეგზავნება პალატის თავმჯდომარეს, რომელიც უფლებამოსილია შენიშვნები გააკეთოს მხოლოდ გადაწყვეტილების ფორმასთან დაკავშირებით. არბიტრაჟი ვალდებულია გაითვალისწინოს ასეთი შენიშვნები საარბიტრაჟო გადაწყვეტილების ხელმოწერამდე.

8.4. საარბიტრაჟო გადაწყვეტილება უნდა ჩამოყალიბდეს წერილობითი ფორმით, საარბიტრაჟო განხილვის ენაზე და მასში უნდა აღინიშნოს :

ა) გადაწყვეტილების გამოტანის დრო და ადგილი ;

ბ) პალატის სრული დასახელება და არბიტრაჟის შემადგენლობა ;

გ) მხარეთა ვინაობა და მისამართები ;

დ) საარბიტრაჟო შეთანხმება ;

ე) დავის საგანი ;

ვ) სამოტივაციო ნაწილი იმ დასაბუთებით, რის საფუძველზეც არბიტრაჟმა მიიღო გადაწყვეტილება (გარდა იმ შემთხვევისა, როდესაც საარბიტრაჟო შეთანხმება პირდაპირ ითვალისწინებს სამოტივაციო ნაწილის არარსებობას) ;

ზ) არბიტრაჟის გადაწყვეტილება (საარბიტრაჟო ხარჯის დაკისრების შესახებ გადაწყვეტილების ჩათვლით) ;

თ) გადაწყვეტილების აღსრულების ვადა ;

ი) იმ არბიტრის ვინაობა (თუ ასეთი არსებობს), რომელმაც უარი განაცხადა გადაწყვეტილების ხელმოწერაზე.

8.5. საარბიტრაჟო გადაწყვეტილება საბოლოოა და სავალდებულოა მხარეთათვის შესასრულებლად.

8.6. ერთ - ერთი მხარის მოთხოვნის საფუძველზე ან არბიტრაჟის ინიციატივით, პალატის თავმჯდომარის თანხმობით, გადაწყვეტილების გამოტანიდან 30 დღის განმავლობაში დაიშვება არბიტრაჟის მიერ საარბიტრაჟო გადაწყვეტილების განმარტება ან / და მასში დაშვებული მექანიკური, ტიპოგრაფიული, თუ გაანგარიშებაში დაშვებული შეცდომის გასწორება. ასეთი განმარტება წარმოადგენს გადაწყვეტილების შემადგენელ ნაწილს, თუ მხარეები სხვა რამეზე არ შეთანხმებულან.

IX. მხარეთა მორიგება

9.1. თუ საარბიტრაჟო განხილვის რომელიმე ეტაპზე მხარეები მიაღწევენ სრულ და საბოლოო შეთანხმებას ყველა სადავო საკითხზე, საარბიტრაჟო განხილვა წყდება.

9.2. მხარეთა შეთანხმებას არბიტრაჟი აფორმებს საარბიტრაჟო გადაწყვეტილების სახით მორიგების შესახებ განცხადების შეტანიდან სამი დღის ვადაში.

X. საქმის წარმოების შეწყვეტა გადაწყვეტილების გამოტანის გარეშე

10.1. თუ საქმეზე არ მიიღება საბოლოო გადაწყვეტილება, საარბიტრაჟო განხილვა წყდება დადგენილებით საქმის შეწყვეტის შესახებ.

10.2. საქმის წარმოება წყდება :

ა) მოსარჩლის მიერ თავის მოთხოვნაზე უარის თქმისას, თუ მოპასუხე ასეთი შეტყობინების მიღებიდან ორი კვირის ვადაში არ წამოაყენებს თავის პრეტენზიებს საქმის წარმოების შეწყვეტის შესახებ და არბიტრაჟი არ დაადგენს მოპასუხის კანონიერ ინტერესს დავის ბოლომდე მოწესრიგების თაობაზე ;

ბ) თუ არსებობს მხარეთა შეთანხმება საარბიტრაჟო განხილვის შეწყვეტის თაობაზე ;

გ) თუ არბიტრაჟს მიაჩნია, რომ რაიმე მიზეზით შეუძლებელია ან საჭირო არ არის საქმის შემდგომი განხილვა, კერძოდ, თუ არ არსებობს ის წანამძღვრები, რომლებიც აუცილებელია საქმის არსებითად განხილვისათვის.

10.3. არბიტრაჟის ფორმირებამდე დადგენილება საქმის წარმოების შეწყვეტის შესახებ გამოაქვს პალატის თავმჯდომარეს.

XI. დასკვნითი დებულებები

11.1. ყველა იმ საკითხთან დაკავშირებით, რომელიც გათვალისწინებული არ არის ამ დებულებით, პალატა, არბიტრაჟი და მხარეები მოქმედებენ ამ დებულების

სულისკვეთებით და იყენებენ ყველა შესაძლებლობას იმის უზრუნველსაყოფად, რომ საარბიტრაჟო გადაწყვეტილებას ჰქონდეს იურიდიულად გამოყენებადი ძალა.